


NYUWO MUNNAAMINI

ETTHU ILA?

 Vano nihinatthi ovekela, kaatthuna kihimye ela, wira nsana ohiyu, kookupali wira waari yoowo, kaahimuleela muhano mmosa, “Mwaira-ru paahi ntoko siniixuttihiw’ahu wira niire, eyo yaamukhala. . . mwanamwane aarina ehikhiri, yaamurowa ovukuwa.” Vano muru wa mwanamwan’owo woovukuwa, nsana ohiyu, esentiimeturu emosa ni vakhani ya mphimo w’ekhlulula. Nto muhan’owo ooruuha va vano.

² Vano, etthu yaakiirinhe siiso, munna, mwaha wa niwoko nimoso. Munnona? Mwawerya vale wona etthu enivareya wiiraneya, enimunnuwiha waamini wanyu wira mutthikele mwaaminiki. Imaara sikina kinniira yeeyo paahi wira, khino, ntoko onvekela mutthu wira ovenye, wira eette nivalo nimoso wala manli, muttikinye ntata nanyu, ottikinya ekatha anyu, etthu emosa paahi ekhanly’aya wira voovirikana, wira yoone paahi wira sothene siri saana. Awo anookhala oonanariwa paahi ni wupuwela wira khenrowa wiiraneya, masi enniiraneya okathi wothene. Munnona? Ehaana wiiraneya.

³ Akavi antthuna wupuweliwa mmavekeloni, vano? Mwaanitthuna ovenxa matat’anyu ni wira, “Pwiya, munivahe”? Nrowe nurame miru sahu.

⁴ Pwiya, okathi oniiw’ahu esipo ela yuulupale ya khalayi ya ekereja, elempwe ni mpatthani aka ooreerexa, Paul Rader, “Waamini Paahi,” hiyo nimmuupuwela vano mmiravo mmosa, aaruuhiwe n’axitiithi awe w’awiixutti, voohivikana mahiku muloko vaamanly’awe Yesu waavaha owerya wo owoomola axetwani ni waavoniha aretta, nto va awo yaari ooxinttiwa voomalela mwaha mmosa wa ecile. Vano awo khumoona Pwiya’ahu arwaaka. Nto tiithi awe khutthimaka khwira, “Pwiya, munimorele ikharari. Mwan’aka mwaamulopwana onnihaawa vanci-ene ni xetwani. Kahaaruuhela awixutti Anyu nto awo khuhiwerya ompenuxa.”

⁵ Yesu khwira, “Miyu kinniwerya, mwaaminiki-ru. Waamini paahi.” O Muluku, Nyuwo khamurukununwe hata vakhani okhuma okathi yoowo: Nyuwo mwa Muluku yoowo, oophenta, oosivela, ni oomoriwa ikharari. Ntoko Nyuwo saary’anyu okathi ule, siiso ti mury’anyu olelo. Nto Pwiya, ntoko tiithi ule, hiyo othene ninnikhuwela, “Pwiya, munikhaliherye mwaha w’ohaamini wahu.” Ti yookhweyaxa; hiyo nnimwiikwattula paahi mwa yeeyo, Tithi.

6 Hiyo ninthuna nooxukhuruni Nyuwo ni woottotopelani mwaha w'omukwannya mwanamwan'ole nsana ohiyu, mwaha wo wona wira nikarakasa nle na muru, naipelanne, nri, nikhuva nisukhumaly'aya, khutthika voophiyaka ntoko isentiimeturu emosa ni vakhani nsana ohiyu. Hiyo ninnixukhuru mwaha wa yeeyo, Tithi. Naasuwelaka wira mameetiku ahu kharina hat'etthu ya yeeyo mwa s'othokosa saya, khiivo hat'etthu anwery'aya wira mwaha wa yeeyo; masi Nyuwo nlelo mwa Muluku, Muratti a sookhumelela sothene. Hiyo ninooxukhuruni Nyuwo, Tithi. Hiyo ninooxukhuruni mwaha w'ororomeleya wa mai ula, ni emaalelo, ni wiiwelela mwaha w'oruuha ekhulula ene khuhela va nipatuuxani n'epaphelo, va, wira ooniherye v'atthuni onamoono awe wa ovuwa wa Muluku. Mwaamukhaani awe akhale mukumi ni akhale mwaana ooloka, wa ovuwa Wanyu.

7 Nwehe matat'awo othene avenxiwe, Tithi. Khula nimosa w'awo nookhalana yoothuna. Nawaka noovenya, nave, Tithi, kookhalana yoothuna. Nto va ari manci-ene va, mwa enamuna ya ipaphelo wala munivukuni mu, arina yoothuna, atthu akhanle ootthuna vekeekhai. Mutthuniherye wira yiireye, Pwiya, wira khula mmosa yaakhele soovekela saya ohiy'ula. Awo ekuxe onamoono wa mai ula nto ntoko nthoonyeryo paahi wira yooniherye wira Nyuwo mwahimya-ru etthu p'itthu, yoomalihiwa. Eyo ti...Nyuwo...Yothene erin'ahu wira waakhela ni wira nittharihaka yeeyo. Owo muteko woomalihiwa.

8 Munivahe, Pwiya, wira khula emosa wa ipaphelo iya ni maleeso ala, atthu anrowa wiixaatheriwa, awo epenuwe. Khula mmosa w'ale avenxale matat'aya, Tithi, awo yaakhele entthuna murim'aya. Hiyo ninvekela mwa Nsina na Yesu. Amen. Mukilaathiki.

9 Kaatthuna paahi kiwooniheni ekhulula ene va, muhano owo (Eyo vo. Hm-hum.)...wira muru wa mwanamwane woovukuwa ntoko Apwiya yaanihimenry'aya mwa Eroho Yowarya nsana ohiyu. Awo kahi ooreerexa? Tivo, enninivaha mulipiheryo munci-ene wira nikhalaneeke waamini ni waamini.

10 Vano, okathi Yesu iireny'awe mwiri ule, mwa Marku 11:23, "Ahikhale-tho onrowa olya mihokorokho s'awo," Siiso Owo ahaakhuwenle. Tthiri ntoko, voohithepya, Owo iirale voomaaleleya, mpakha awiixutti Awe paahi...kinoona wira mmosa a yaawo aahimwiiwa. Nto eyo...Okathi n'ecil'ole, okathi orwiiy'awe ohoolo wa Pwiya Yesu, mmiravo owo aahihaawa vootepeya vahaatonko awe ohaawa; khino, aahimorela vathi ntoko wira aarimookhwa, masi owo khusuwela wira aahikumana ni Mutthu mmosa aarina waamini vanci-ene waavikana arummw'ale.

11 Vano, kaatthuna wira mutthu ahaamini ovoniha wa Muluku aawehale yeela. Yesu aahaavaha owerya wo woomola irooho,

vano awo khuvonya. Kahi owerya waavonyale, masi awo ti yaavonyale. Yesu aahaahimeerya:

“Xeeni hiyo ohiwerya omoomola?”

Owo khwira, “Mwaha w’ohaamini wanyu.”

¹² Ekereja nlelo yookhalana owerya. Muluku khonakumiheke owerya Wawe mukereja, masi ekereja kherina waamini oniphiyerya wira evareke muteko vasulu va yoowo. Ti yeeyo tu. Ti yookhweyaxa siiso. Hiyo ninthuna okhaliha yoorika imaara sikina, masi vanci-ene munikhalih’anyu Ehapari yooreera yookhweya, munookhalanexa ekeekhai, mwaakhalihaka-ru yookhweyaxa: Muluku ohimye siiso; eyo ennimaliha mwaha; nto ti yeeyo tu. Nto mwaamini paahi, mukelele ohoolo.

¹³ Okathi Yesu iiraly’awe, “Ahikhale-tho onlya mihokorokho s’awo,” vano, mataakhuru yaari ooreera paahi ni oocerimela ntoko yaatonko aya okhala. Nikukhu naakhala ntoko vamosaru, masi vathi vale vathi v’etthaya mmitatthaarini mme, ekumi yaahipacerya olakaseya.

¹⁴ Siiso t’ery’aya ni kankuru, ni khula enamuna y’eretta mu—munthun’anyu wuupuwela. Mwaaweryaka okupali Masu a Muluku, vathi vale saana mmitathaarini, kankuru pooti okhala vaavale; ntata nanyu pooti okhala nooturuwa paahi. Eyo kherina naata ni ovoniha wa Muluku. Eyo ti, “Nyuwu mwaaminiki-ru.” Munnona? Vathi vale nipuro nlo, yoopacerya ovara muteko.

¹⁵ Yesu ohimye wira, “Mwairela mwaak’ola, ‘Othaame-vo,’ muhioveryaka mmurimani mwanyu, masi mwaaminiki wira ehimaly’anyu enimwiiraneya, munimwaakhela ehimaly’anyu.” Eyo kahi yooreerexa? Eyo yaarowa okhuma wa pani? Mwaana a Muluku, Yoowo Masu awe. . . Erimu n’ilapo ya vathi sinoomala, masi vano. . . masi Masu Awe khammala.

¹⁶ Vano, enamuna emosa paahi mukhanly’anyu wira yeeyo, muhaana okhalana yootthuna yooloka ni niwoko nooloka. Vano, vaakhanle wira kaamukhumela nno khwira, “Miyo kinoowoonihani wira kinniweya othamiha mwaak’ola, ‘Othame-vo, mwaako.” Owo khuwaakhalakhala othamaka. Vekeekhai nnari. Hata kaarina exeeni. Ehaana okhala. . . Yoopacerya muhaana ophwany a otthuna wa Muluku.

¹⁷ Mwaha wa yeeyo, imaara sinceene muliinyani mwa mavekelo, miyo—miyo kinikuxa yootepaxa olipa, okhala wira eyo etthu evinre muliinyani ni siiso, ni ti vaavo entthik’aya. Masi moone, mwaarineene etampi ehilampwe. . . Mootoko oweha wira myaha kamosa-kamosa, kihinatthi oruma erooho yootakhala okhuma? Miyo kinooweha mwah’owo saana ene wira kikupali wira khiivo hat’etthu mwa makhalelo awo yaarowa okhottiha etthu p’itthu, moone, okhala wira muupuwele, mwa soovaha iya, vaamuweryaney a nyuwu okhalana mulattu ni seiyo.

¹⁸ Muluku, nyuwo munnuupuwela emaara emosa, aahinvaha profeta . . . aahimukhaliha mulopwana mmosa profeta, Moise, khumuhimeerya wira orowe, alavule ni mwala. Nto profeta aari othene oohivilela, nto khurowa, khumana mwala, ehimyaka otteetheya wa Kristu, wira Owo aahaana okhwa emaara yanenli wala omaniwa emaara yanenli. Owo aahikhalana oweriya w'oruuha, masi khiwaari otthuna wa Muluku.

¹⁹ Miyo nkinaweryeke waamini wira waari otthuna wa Muluku wira Elisewu atthike, 'okhala wira anamwane ale yaanimunyoonyiha mwaha w'okhala nantari, miyo nkinoona wira aahaana wira yeele. Masi owo aari profeta, ni aahinanariwa, vano owo khwaatakhalaha anamwane ale vano ikhaya piili khuwiiva axinamwane miloko mixexe n'anli oohittheka. Munnona? Masi nkinaamini wira owo aahaana wira etthu ile. Ni eyo paahi—paahi . . . hiyo . . .

²⁰ Muluku, kookupali olelo, Owo ohinatthi ohela ekereja Awe mooweryani, Owo onimwehererya ekereja wira oone etthu enrow'aya wira.

²¹ Hiyo . . . okathi mukina, khino, Apwiya yatthuna vale katthika vale, ninookhalana okathi w'ohimaxaxa etthu ntoko yeeyo, etthu ehanle okhumelela, vano nto ninoosuwela saana ya yeeyo nto.

²² Masi nyuwo mwalavula nuulumo paahi, wira, "Pwiya, miyo kinnaamini," muhihoverye, muhimye ni murim'anyu . . .

²³ Vano, nrowe niire ntoko nlikanyiho, miyo kaakhanle vakhatoni, nto nki . . . Kaakhanle kaaleeryaka atthu emilyawu ntero, masi epantte ekina ya mwaako iwe, khukhala nikhuru n'atthu emiya emosa, ni awo anookhwa ehimusuwelaka Kristu. Ahe, kookhalana emilyawu ntero nno wira kaalaleerye, masi nnakhala vo, Etthu mmurimani mwaka ennikileela, "Mwaaphanye atthu ale. Murowe wa yaawo. Awo anoopweteya." Miyo nkinthuna orowa yoomi, masi yookhala Etthu mwa miyo. Moone, owo ti Muluku nto, oneetta. Moone ele ekhanle yoothuna, moone nle nikanle niwoko n'orowa, kahi mwaha wa mma . . . Vano, kahimya wira, "Ahe . . ." Vakhala wira yoothuna aka ti yooloka wira kirowe iwe, masi nto kinoovenya va vano wookhala mwaako muulupale, miyo khunaira, "Moosuwela, kavira-ru mwaak'ole khuwoopola atthu ale othene emiya ntero, nihiku nimosa awo anoohela etthontto vale: Munna Branham, murummwa muulupale." Vano, niwoko naka khanilonke. Mwaako owo khunrowa omora. Nnari, mulopwana.

²⁴ Masi niwoko naka ni yoothuna aka yakhala-ru yoolikana, ni wira Muluku mmurimani mwaka t'onikeetiherya, vano khuhinawerya ovira mwaako, orukurerya mwaako, ovira vathi vamwaako, kaamwiira, "Mwaako, othaame-vo." Khino eyo . . . Okathi kaarow'aka ohimya yeeyo, ni kihimyaka-ru ni muthinto yoowo w'eroocho yooloka, keetthiwaka ni Eroho

Yowarya, mwa otthuna wa Muluku, siiso yahaarowa okhala ekhwiyeri yaamukhaani ya mwaak'ole waarowa omora, masi yaamurowa wiiraneya. Nihiku noottharelana khino waammora ekhiilu emosa. Nihiku noottharelana mpantte wa neexexe wa etonelaata. Nto khino muhina mwa mweeri ntero, itonelaata thanu saammora. Vano nto? Khino nlelo kihoonale, masi owo onoottikinyeya, orowaka omora. Miyo kinookhala vaavo vene kiwehe etthu iyo wiiriwa, okhala wira Muluku ohimmye siiso vano eyo ennimaliha mwaha.

²⁵ Munniwerya owuupuwelela yeeyo ame anyu iwo ohiy'ula? Vaareera, nyuwo muupuwela-ru siiso, awo anoookhala akumi. Vaareera. Eyo ti mwaaminiki-ru paahi: mulavule nuulumo paahi mukhale ni nenlo. Munnona? Mwaamini paahi; nvarelele nenlo. Eyo Ekumi Ehinimala.

²⁶ Vano, meelo oxekuwa . . . Miyo koomuleela Billy, ohiy'ula, wira ohieye ittikitti sa mavekelo, ni kaatthuna olavula. Miyo kinihimya, mwa ekeekhai, kinneetta mikwaha okhuma Janeiro, ilapo s'okhopela, n'utthika, oPhoenix, orowa owaani, n'utthika, ni sothene voomalela (othokorerya iwe) mpakha kinikhal'aka ootteettheya vookirikela osuwela vary'aka imaara sikina. Ekihin'ye oolamwa paahi.

²⁷ Vano nto, kihaana okhuma, nto awo . . . nyuwo—nyuwo axinna mookilattula okhala-tho mahiku vakhani. Moota kinxukhuru-aka yeeyo. Miyo vekeekhai kinuupuwela wira nla nikhuru nooreerexa n'arumeyi va. Kaanitthuna nikhalanne-ene okathi vakhani-tho w'opatthana. Apwiya yatthuna vale, kinootthika nihiku nikina. Hat'etthu ekina, orowa paahi ekereja n'ikereja ni weetta mpooma ni wooxekuryani nyuwo othene. Kaamutthapela wira yeeyo: etthu p'itthu kinwery'aka wira wira kikhaliherye Omwene wa Muluku, eyo ti, nyuwo mwatthuna vale wira kiire. Ni otthika nihiku nimosi ni otakanxana n'ukhalana muthukumano, woosivela wooreera nipuro nlo.

²⁸ Nto muupuwele, axinna, kinrowa okhala koovekelelakani. Eyo etthu emosa ekeekhai. Ni kintthuna wira nyuwo othene mukivekelele, othene anyu.

²⁹ Nto vano miyo—miyo ka . . . Meelo voosiisu sinookhala miteko s'okokhorela mwa ikereja iya sothene soohiyana-hiyana mpooma wothene.

³⁰ Vano, makhuru kamosa-kamosa a oJeffersonville ari vaava. Apatthani aka kamosa-kamosa, mmosa wa maatinistratoore aka a okereja, ori vaava, Munna Fred Sothmann. Nlelo nkinatthi omoona vamuthukumanoni. Ni munna . . . Oh, axipatthani aka akina anceene a wu oJeffersonville, awaka pri- . . . sakartaari aka vale ni—ni othene ari vaava, nipuro nlo vamuthukumanoni. Nlelo nkiwoonale.

³¹ Nto axinna, sookhala ikereja kamosa-kamosa sooreera nno epooma ela. Ni othene nyuwo aletto akina, mphwanye emosa

wa seiyo nto murowe ikereja seiya meelo. Iyo sinimookhalihani saana, kookupali. Awo axinna anaamini muthinto yoola wa muteko. Tivo awo aris'aya va akilante-ene vaplataforma ni vathi mmapuroni va, okhala wira awo annaamini. Ni miyo kinnaaxukhuru axilopwan'awo.

³² Apwiya, ereerihe mpantte ola mukhaani wa Alipa a Nakoso a Ehapari yooreera Yoomalela va yaawo—yaawo akhalihenrye muthukuman'ola. Yookhala... Kookupali wira ti yeeyo, akhalihenrye muthukumano. Miyo—miyo kinnirowa w'anamakhalihery'aya anci-ene, okhala wira iwo... Khivaatthuneya hiyo okhala siisa, masi imaara sinceene, axinna annihiya ivirikanelo sikhaani: ntoko mutthu onaamini *etthu* yaamukhaani; mukina, *etthu* yaamukhaani; mwa enamuna emosa eyo enniruha ohiiwanana vakhani ni makhwatta a khalayi a okathi ovinre; naahaana okhala nivonne-ene mwa okathi ula, masi nlo—nlo... Nto nyuwo, wala, miyo kaakhalaka n'Alipa a Nakoso a Ehapari yooreera Yoomalela, vano eyo mwa enamuna emosa ennikhaliherya okhaliha vamosa, nto ninnithukumana vamosa, ni ninnikhhalana opatthana w'ekeekhai vamosa, vekeekhai okathi wooreera. Ni ninnixukhuru yeeyo. Muluku areerihe mpantte owo. Kinnaamini wira Apwiya avenxenrye niwoko.

³³ Vano... nto vo kaahikhalana oreeriwa wuulupale wo woona nipuro na Munna Oral Roberts nihiku nle. Nto wulu, nlo nipuro nuulupale, *etthu* yooreera. Nlo ti—nlo ti muupuxeryo wa Pentekosite.

³⁴ Vano kaahirowa nipuro na Munna Tommy Osborn, nipuro nikina nooreerexa, mutthu ooreerexa a Muluku, yoowo... Munna Tommy ni miyo khanireere opatthana, ni Munna Oral, nave, axinna oopatthana saana, ni ninniphentana mmosa ni mukhw'awe, ni ninniilipiha wira nihelele sothene sinwery'ahu wa ereerelo y'atthu Moomweneni mwa Muluku.

³⁵ Tivo miyo vekeekhai kinnaaxukhuru axilopwan'awo okhala nno epooma yeela eriyari y'akina w'axilopwana ala oreera murima nrin'ahu. Nyuwo ipwittipwitthi murina amakhampusi ooreerexa murima. Miyo paahi, kinoohimya siiso. Apwiya etthikele ekhalaka ni nyuwo othene ti mavekelo aka. Nto vano meelo oxekuwa, miyo... Muteko ompacerya okathi xeeni, axinna? Iwoora piili ni minuutu miloko miraru. Nrowe niire emosa—emosa wala emosa ni minuutu miloko miraru muhaana okhala va wira awo ehithikilele miteko mikina.

³⁶ Vano, amiravo yiira ahoohimenryeni, ohiy'ula awo aakhalanasa iliivuru kamosa-kamosa, ilatarato ni sikina, ni ifiita, ni itisku, ni... sa mithukumano, nto awo anootumiha. Masi khaninrowa waatthuniherya otumiha Saapatu, meelo. Hata iliivuru khiivo *etthu* enrowa otumihiwa meelo. Vano hiyo

khani...hiyo khinnatthuniheryeke yeeyo. Anamwi anceene yiiraka, “Khamunreere ovonya...”

³⁷ Nto Tiithi mutokweene Bosworth aanikileelaka, “Oh, Munna Branham, nyuwo moovonya vo,” masi ti siiso sinoon’aka (Munnona?), ni miyo—miyo kinnoona. Nyuwo mwatthuna vale emosa, awo animoovahani emosa, masi nyuwo... Masi khanikhanle otumiha sa—Saapatu. Nnari. Ti yeeyo tu. Vakhala wira kinnaamini yeeyo, kihaana weettela, paahi... kihaana weettela yoomi mmansaka. Munnona? Ni miyo—miyo kihaana okhala kittharihaka ikupalelo saka nto siiso... Ahiiso munooveleeliha owaani, ni, mpakha owaani, osulu iwe n’ukuxa.

³⁸ Vano ohiy’ula, oh, nrowe othene niliyale eyo paahi, oh, wira wookhala muteko wira ovarawe, wala etthu p’itthu ekina, wala miteko soorika sa nihiku. Nrowe nihiye itthu sothene paahi, niwehe Masu minuutu vakhani, noone etthu Muluku onnihimeery’awe mwa Masu Awe. Ni t’uvekela waka wira Muluku anivahe paahi eparakha yuulupale saana ohiy’ula.

³⁹ Gene, mwaamuwerya okivarela owo miyo? Mwaamuwerya okivarela mwaaruusi ule? Owo kahi etthu yaamukhaani yooreera? Mwaamutthuna orowa owaani ni miyo woopa ni Sarah aka mwaamukhaani, onnunwe ntoko so? Oh, mwaamutthuna? Miyo—miyo kaanithuna muronwe-ene. Owo onihala olikana ni nyuwo wunnuwa, ni owo mwaaruusi a Paapa. Um-hum. Hum. Nto kinnikupali wira nyuwo—nyuwo munnaaphenta Apap’inyu nave, khamunaaphenta? Amaama? Oh, vekeekhai munaaphenta. Mwaaruusi oomalela oreera, kiry’aka va, kimuwehaka. Maitho makhaani ankhala ntoko miithe miili siviye vamukhumini ni—ni maihi makhaani ookhwila.

⁴⁰ Miyo okisivela axinamwane. Kookhalana axiruusi anli owaani. Mmosa aya ti Rebekah nto mukina ti Sarah.

⁴¹ Va okathi vakhani ovinre, kaarookhuma. Awo oowanli axiruusi a Paapa, moosuwela, ni miyo kinnaaphentasa. Nto kimalaka-ru okela kihaana waayara ottuli, ni... Becky paahi oopacerya wunnuwa v’omwiiriha yeeyo; owo onthipeerya eyinnuwelo aka. Owo aamunta muthana aka vano; owo... masi owo nlelo mwaaruusi a Paapa, khula enamuna. Nto vano, eyaakha yoophiyaka emosa okhuma vano, ninthuna omuhela muxikola a Bibilia nipuro nlo nimukumihe exikola y’anamunceene.

⁴² Vano nto, awo yaalipelela Apaapa, moosuwela, orwa owaani. Miyo kaari mmithukumanoni. Nto meelo ohiyu awo anrowa olipelelaka mpakha ohiyu eriyari wira miyo kirwe. Nto siiso, miyo kaaphin’ye oxaka-ene voosiisu, iwoora tthaaru wala xexe sirumaka-ru. Nto ame awe khurwa ohula mukhora wira kivolowe, ni kaari ookhulumuwa ni oolamwa, miyo... Va vaplataforma, miyo... okathi e... oreerihwa onikhala saana, masi owo omalaka-ru woohiyani, ti vaavo munkhalan’anyu

mukattiyamiho. Akavi atonko osuwela yeeyo? Vano, vekeekhai ti siiso.

⁴³ Nkawehani. Eliya aahiwela vamwaako khwiihana mooro okhuma wirimu, khwiihana epula okhuma wirimu, nto nuumala okathi Eroho emuhiyaly'aya, owo aaheettasa mothakoni mahiku miloko mixexe nto Muluku khumphwanya, aipinthe-ene mmuttuphani nipuro nlo.

⁴⁴ Yona, owo aaroorowa khukhala mukumi mmirimani mwa nankumi mahiku mararu ni ohiyu, khwaamuleliwa mukerekhere w'ephareya khukhuma aleleyaka mapuro othene. Muttethe wothene khurukunxa murima khurwa wa Muluku. Nto okathi mureeriho omuhiyaly'aya, owo khurwa vasulu vamwaako khunvekela Muluku wira akumihe ekumi awe. Munnona?

⁴⁵ Miyo kaahikhala vakhapurini va William Cowper, kahi khalayi, yoowo olempe esipo ele yoosuweliwa hiyo ninrumeel'ahu mmutekoni mwahu wa ekomunyawu:

Yookhala Ephattuwelo yoosareya Ephome,
Enikuxiwa mmutikani mwa Emanuweli,
Memmo anatampi ampwin'aya
moohuruwelani . . .

⁴⁶ Mootoko wiiwa etthu owo . . . yaamukhumelenle yoowo? Nuumala muupuxeryo omuhiya okhuma vaavo, owo aatthuna ophwanya muro wira aisiive.

⁴⁷ Miyo kinkhala ohoolo wene Empa Kentucky ya Khalayi. Nto Stephen Foster oomuvaha Amerika isipo sawe soosuwelaxiwa s'atthu. Nto okathi waalepak'awe, aaphwanya muupuxeryo, muupuxeryo ole, aanilepa esipo, vano okathi waakhum'awe mwa yoowo, owo aamurwa ohapaliwa. Vookiserya, khumwiihana karumeya khimukuxa kalaveethi khwiisiiva.

⁴⁸ Atthu khansuwela etthu enaavirela atthu ale ankhala mmukhaleloni mwa erooho. Vano *va*, nyuwo munoona ntoko mwaamuwerya othamiha mwaako. Masi muhiye mureeriho okhume mwa nyuwo, nto mpacerye orowa ovira vamukhorra vale (aahikhale mutthu vale wira oovareni, moone) vano nto, khino iwoora vakhani, vanoorika nyuwo, munimwiikoha vatthu vary'anyu. Vano nto ohiyu p'uhiyu, owo onimoophiihani vammalel'anyu.

⁴⁹ Nto vakhani . . . Kintthuna koothariheleni sa axikhaani Sarah ni Rebekah. Vano voosisu aya, nkaawerya orupa, vano miyo khuyenya, kaakilanthe vakhaterani, nto nuuvira okathi vakhani Becky, okhanle muulupale, owo aari—aarina metto soorakama omuvikana Sarah, nto Becky khurwa atthyawaka . . . khuyenya, khitupha voolilini, ohinvenxale muhim'awe, nto va owo khurwa atthimakaka mpaani, atthimakaka vancipale ntoko saawery'awe. Owo iira, "Apaapa, Apaapa . . ." Miyo khulokiherya mwetto aka mmosa, vano owo khutuphela vaavo, khulupa saana. Enamuna emosa ntoko e—ekereja

ya naanaano, moosuwela, eyo enikhala mmuseweni okathi munceene, moosuwela, mwa iyaakha imiya sene. Owo aaniwerya wiilipiherya saana mmansawe, nto khukipweherya miyoono sawe khwira, “Oh, Apaapa aka, Apaapa aka . . .”

⁵⁰ Nto Sarah mwaamukhaani, vootannyeya, khuyenya. Ahe, nkisuwenle sinto an’inyu anniira, wala nnari; awaka anniira: ale axikhaani ankuxa ikuwo s’ale aalupale. Nto siiso Sarah aawanre epixama ya Becky, sa metto suulupale saana, moosuwela. Nto va owo khurwa, ooyeva saana ookhuveya, amoraka, aikwattulaka. Nto owo khurwa vale, voopisa vakhani. Vano Becky khurukunuwa, khwira, “Sarah, muhim’aka, kintthuna koolele etthu.” Owo khwira, “Miyu kiphin’ye va oopacerya. Nto kiihithukumanyerya. Tivo miyo kihaana Apaapa othene ni khiivo ehanle yawinyu.”

⁵¹ Ti siiso atthu kamosa-kamosa aneerery’aya wuupuwela sa etiini, kahi siiso? Uh-huh. Ti yeeyo.

⁵² Nto Sarah mwaamukhaani owooniha othunku, owo khumetula eyano awe, ni maitho awe makhaani ooriipa khukiweha, vano owo khupacerya wunla. Vano Becky aahikiphiteerya ni ethoni awe, akipatinkhe-ene. Miyo kinnimpenta. Vano Sarah khupacerya otthika ’okhala wira Becky aahaakuxa Apaapa othene. Miyo khukhalihani nikutha nikina so nto khunkwata owo saale. Oh, owo khuhakalala naanaanoru khutthimaka, khutuphela vanikuthani vaka wira . . . Owo aari mukhaanixa ni metto sawe hata khasaaphiya vathi. Owo eetta aveveleyaka (khino, ntoko siry’aka, oveveleya vakhani, moosuwela), ni owo khaa . . . khaawerya ophiya vathi. Owo khaari muromolelo muulupale, moosuwela, nto siiso owo khaawerya ophiya vathi saana. Owo nlelo aari mukhaani.

⁵³ Nto vano, owo khaalimpe saana, nto miyo khumpweherya miyoono saka so khumpatikha kiisaattamiheryaka saana, vano owo khwaariha maitho awe ale makhaani ooriipa, khunweha Rebekah. Owo khwira, “Rebekah, nuunu aka,” owo—owo khwira, “siiso eryeene ekeekhai wira nyuwo mookhalana Apaapa othene, masi kintthuna wira musuwele etthu emosa: Apaapa aakikhalana othene miyo.” Vano . . .

⁵⁴ Eyo ti . . . Vakhalaru wira Owo ookikhalana miyo othene. Miyo pooti ohisoma wira kikhallane ithu suulupale, masi vakhala-ru wira koosuwela wira Owo ookikhalana othene miyo, moweettani mwaka wooveveleya, mmuhiye Owo akipatikhe ni miyoono soomiili, eyo enookooniha oreera paahi.

⁵⁵ Ahe, nrowe nivahererye nuulumo nikina naamukhaani na mavekelo wa Yoowo nihinatthi okhunla Masu.

⁵⁶ Vano, Tithi a Wirimu, hiyo ninnisuwela wira nri ntoko anamwane nave. Ni—ni Nyuwo onnoosivelani okhala ni hiyo, ni okokhorela ni hiyo. Ni okathi onookokhorel’ahuni, ni Nyuwo munniniphenta, ni munninivarela mmoononi mw’Anyu,

ni munniveleeliha Eroho Yowarya Anyu, ni onisuweliha wira Nyuwo mwa mukumi ni wira Nyuwo mwa Tith'ihu, hiyo ninnooxukhuruni vanceene. Vano, muhiye Eroho Yowarya erwe wa hiyo ohiy'ula. Mphente khula murima, Pwiya. Munivahe eparakha ya naanaano. Munimwaraxele okame wa omoriwa ikharari, Tithi. Muhiwehe itampi sahu. Iyo khasireere waatta. Pwiya, mulevelele paahi. Muliya, Tithi, ni munikuxe paahi mmoononi Mwanyu, ni—ni nvonihе iretta sahu, ni—ni murapihe minepa sahu, ni mukhalihe irooho sahu sootaphuwa, Pwiya, wira niwerye wookokorelani ni woottotopelani Nyuwo, nikhale ntoko axinamwane antthimaka vatthokoni, nisuwelaka paahi wira Apaapa anoonikhapelela. Munivahe, Pwiya.

⁵⁷ Vano, khaavo mutthu onwerya o—otaphulela Masu. Hiyo ninnisuwela eyo. Yohani aahoona Eliivuru moonoo woolopwana wa Ole okilante veehiceni, ni khaakhanle hata mutthu wirimu, wala elapo ya vathi, wala muhina w'elapo ya vathi aaphwanela okuxa Eliivuru wira akhunle, wala otaphula ikanyeryo. Nto vo aahirwa Mwaapwittipwitthi, yoowo iiviwe okhuma wopattuxiwani w'olumwenku. Nto Owo t'aphwanela. Vano Owo aahikuxa Eliivuru, khutaphula ikanyeryo, khukhunla Eliivuru iyo. O Mwaapwittipwitthi, murwe ohiy'ula. Munikhunlele Eliivuru hiyo, Tithi, okathi onoolipelel'ahuni Yeenyu, vano hiyo ninvekela mwa Nsina na Yesu, Mwaapwittipwitthi a Muluku. Amen.

⁵⁸ Miyo koothanla, ohiy'ula, eversiikulu yaamukhaani ya Yoolepwa va ya moolumo mararu. Masi kintthuna toko kisome eversiikulu emosa wala piili mwa Yohani Oowaarya, kapiitulu 11 opacerya eversiikulu 23.

Yesu aahimuhimeerya wira, murokor'inju onoohihimuwa.

Marta aahimwaakhula wira, miyo koosuwela . . .owo onoohihimuwa nihiku n'ohihimuwa nookiserya.

Yesu aahimuhimeerya wira, Miyo ki ohihimuwa, ni . . .ekumi: ole onikaamini miyo hata anakhwaru, onookhala-tho mukumi:

Vano ole orina ekumi ni onikaamini miyo khankhwa-tho. Nyuwo munnaamini etthu ila?

Owo aahaakhula wira, Ayo, Pwiya: Miyo kinnaamini wira nyuwo mwa Kristu, Mwaana a Muluku, yoowo aarowa orwa molumwenkuni.

⁵⁹ Nto wa yoosoma kintthuna kirumeele moolumo ala mararu: *Nyuwo Munnaamini Etthu Ila?*

⁶⁰ Miyo koosoma ehantisi emosa okathi vakhani ovinre. Kinoona wira yaari ehantisi yoowuupuweleliwa. Ni anceene w'arumeyi, kinoowa wira, aasoma eliivuru ya Totori Ingraham ya—ya *Mukhulupale A Mpaani Mwa Davidi*. Eyo eliivuru

yooreera. Eyo, kinoona wira, vekeekhai yoomala. Kaanithhuna kikhalanne-ene yoothhitiwa, wira kipweheke eriyari y'atthu.

⁶¹ Nto memmo, miyo kaamusoma artiiku mmosa a Lasaro ula, ni a Yesu, ni Maria, ni Marta, wira, axirokor'awe Lasaro. Ni kaasoma mme wira weiwo Yesu aakhal'awe, kookupali, ni Marta ni Maria. Awo oowanli yaari aximwali aHeperi oophenteya. Nto Lasaro aaxutta ahiiso aamusoma wira akhale mulipa a ikano mpaani m'okokhorela, apakaka ikano s'anamukuttho.

⁶² Nto Yesu aahikhalana opatthana wooreera, vanci-enexa ni Lasaro. Naasomaka muliivuruni wira okathi Owo orwiiy'awe vatthokoni vaya, ni Marta aamupisa vakhani wiiwa moolumo Awe, masi owo aahaana olikanyiha yolya y'ohiyu ni ohela vameesa, masi Maria aakilanthe munawoni Mwawe. Vano Yesu khwira wira Maria aathanlale itthu sootepa oreera.

⁶³ Vano nto, hiyo noohimeeriwa wira Lasaro aari ule aamuruuhale Yesu wa Yohani, ehantisi ya eliivuru ya Totori Ingraham, ni . . . ya *Mukhulupale A Mpaani Mwa Davidi*. Nave, eyo siiso ehikhalaka ekeekhai, miyo nkisuwenle, masi wa mulipiheryo paahi, masi Owo aahaana wira akhalaka ni yaawo.

⁶⁴ Vano, hiyo nihiixutta ela enoorwa, esumana ela evinre, kiireke, wira Yesu oohimya mwa Yohani Oowaarya 5:19, "Miyo . . . Mwaana khanwerya wira etthu Meekh'awe, masi ele eniwoon'awe Atithi yiiraka: Mwaana onniira seiyo. Atithi annivara muteko ni Mwaana onnivara mpakha va." Munnona? "Ele Owo oniwoon'awe Atithi yiiraka."

⁶⁵ Vano wira nikhalihe ehantisi ila yekeekhai, Atithi, Muluku, aahaana olavula ni Mwan'Awe, Yesu, khwira, "Mpatthan'Inyu, Lasaro, onrowa okhwa, masi enrowa okhala y'oreera, tivo Nyuwo mukhume etthoko eyo. Murowe, 'okhala wira munrowa ovekeliswa Nyuwo wira munvekelele, wala, onvoniha, ni—ni Miyo nkinthuna wira Nyuwo mwiire." Nyuwo mwaweha vale ehantisi ene okathi onrow'ahu otharihaka, munimoona wira emmalela mw'ekeekhai ya yeeyo. Tivo, Yesu, voohilopoliwa wala etthu siiso, aahikhuma etthoko ele khuruwa nipuro nikina, khuhitthika ohiy'ule. Nto Owo aaronwe mittetthe mikina. Nto Yesu amalaka—ru okhuma etthoko ele, mukattyamiho khukela.

⁶⁶ Vano Yesu akhumaru vatthokoni vanyu, mikattyamiho sinimoorwa. Muupuwele paahi, okathi Owo onkhum'awe vatthokoni vanyu, mikattyamiho siri mphironi. Mwaakhalanaka maira anyu epatthani n'itthu sothene siireyaka mukereja mwanyu oratteene, ntoko Rickenbacker muulupale a isilinturu muloko ni thanu na mosa, vano khunamuhiya Yesu ota wa yeeyo, okathi Yesu onkhum'awe mukereja mwanyu, mikattyamiho siri mphironi. Ayo, mulopwana, Yesu ahiya—ru muromolelo, yoowo awo animuhel'aya Owo ota ni wira, "Ahe, vano hiyo khinnaamini wira itthu iya saamuweryaney a okhala soolikana

oratteene,” vano munapaka etthu ekina, mikattyamiho siri mphironi. Muupuwele yeeyo paahi.

⁶⁷ Enikuupuxerya ehantisi emosa ya Pwiya Yesu, eniphwanyaneya muLiivuruni mwa Luka. Nyuwo moosuwela okathi Owo aary’awe mmiravo a iyaakha soophiyaka muloko ni piili, Atthu Awe yaahimukuxa, ntoko yaary’aya elimalela khula eyaakha, orowa oniirani wa Pentekosite. Nto awo eryeene mmuttettheni m’oYerusalemu oniirani ni evirihaka okathi wooreera, hiyo nimphwanya mBibiliani, wira awo yaahikhala mahiku mararu ehikhanle ni Yoowo. Ni wira awo yuupuwela wira khino, yaakanyerya paahi, wira Yesu aari eriyari y’amusi aya kamosa-kamosa. Vano, nihiireke siiso. Okathi aronw’aya oviravira mw’amusi aya ephavelaka, Owo khaakhanle-wo.

⁶⁸ Ni hiyo nihaakanyeryeke, okhala wira paahi hiyo n’aMetotista, aPatista, Maprespiteriyaano, aPentekosite, ni wira ikhalayi sahu ni axitiithi ahu yaari alipa-oowaamini aalupale, hiyo paahi, ahe, khunaakanyerya wira Yesu ori ni hiyo. Nihiireke siiso. Hiyo nihaana okhala ophitaana ni Yoowo khula nihiku ni khula minuutu. Oh, okisivela eyo.

⁶⁹ Kintthuna ele ekhanly’awe Muluku vano. Ele yaarina axitiithi aka, ele yaarina amuharoiye aka, ti yooreera, masi (Ele awo yaarin’aya ti yooreera.) Kinoona wira hiyo nri ohoolo saana mphironi.

⁷⁰ Nrowe noone etthu Owo okhanly’awe olelo. Nkintthuna oweha ottuli ni woona etthu Mwenye Moody iiraly’awe, okhala wira hiyo nri ohoolo saana mphironi omuvikana Mwenye Moody. Mulattu wa ikereja sahu: hiyo ninooweha ottuli ni wira, “Ahe, nrowe noone etthu Mwenye John Wesley ohimaly’awe, etthu amosa-amosa w’akina ahimaly’aya.” Mwaha wa yeeyo siyensiya ory’awe ottaiwenexa vapuwani vaya, ovikana etiini vawaya.

⁷¹ Va iyaakha imiya tthaaru sivinre, siyentista mmosa mFaransa aahooniherya wira mwarowa-ru ni waakuva wa ikilomo miloko mithanu ni thanu na mosa khula ewoora, elemelelo yaamurowa wookumihani elapo ya vathi. Nyuwo munoona wira siyensiya onnitthikela ohimya yeeyo olelo? Awo anrowa ikilomo ikonto miloko miraru ni miloko mithanu ni thanu na tthaaru khula ewoora ni nlelo yincereryaka. Awo anootepe erowaka, ewehaka ohoolo. Masi hiyo ninthuna niweheke ottuli ni woona etthu Moody ohimaly’awe; Sankey ohimaly’awe; Finney ohimaly’awe; Knox, Kalvino; amosa-amosa w’awo. Etthu awo yaahimaly’aya yaari yooreera. Eyo yaari y’okathi aya, masi hiyo ninkelela ohoolo.

⁷² Apwaapu aka yeettaka n’ekaaro yaapuruliwa n’inyompe. Miyo kinimweettiha Ford V8. Mwan’aka onrowa ovavaka mmuttekeni. Eyo ti, hiyo ninkelela ohoolo. Ti siiso yaatthuneya wira etiini ekhale. Orwa w’Apwiya ori vakhiviru. Ekereja yaahaana otthikela ekelaka mooweryani mw’aya. Siyensiya

onwerya paahi owela mpakha nipuro nlo vano nto ohaana omora, masi hiyo nirina iphattuwelo sihitemuleliwe, sihinatoko okwanyiya, sa owerya, ohina mukaano, wa Muluku, memmo waatthuneya wira nikeleke-mo. Hiyo ninkhala ikilomo emilyawu emosa ni imiya thanu na mosa ni thanu na xexe vathi va oreeriwa wahu ohiy'ula, sa oreeriwa w'aKristu wira nipuheke. Kinnuuliwa muru yoomi okathi onweh'aka ota nno ni woona myaalaano, ni iretta, ni mikattyamiho sinkhumelela naanaano va. Ekerej'ahu yaahaana okhala yeetaka mphironi, yaavonihaka aretta, yaahihimuxaka alipa-ookhwa, ewoomolaka axetwani, epakaka ithoonyeryo ni mitikiniho, esuwelihaka olumwenku wothene wira Yesu Kristu mukumii. Ti yeeyo entthuneya okhala niiraka.

⁷³ Vano, nyuwo muniira, “Mwenye Moody khona. . .” Mwenye Moody khokhanle nihiku nla. Eyo ekeekhaii. Hiyo ninkhala wa Orwa w'Apwiya. Ni hiyo ninimwaakanyerya paahi wira Awo yaari n'amusi ahu. Masi nihiku nimosa namatharimula mmosa aamutharamunly'awe Mwenye Graham, naahiphwanya wira Owo khaari n'amusi ahu.

⁷⁴ Awo animuphwanya woowi Owo? Ti vayi a—awo yaamuphwanye woowi Yesu? Vaavale awo yaamuhiyaly'aya. Awo yaamuhin'ye woowi? Oniirani wa Pentekosite. Hiyo nimmuhiya woowi Yesu, ekereja emuhin'ye woowi? Oniirani wa Pentekosite. Okathi okhumaly'ahu mooweryani mme wa Pentekosite wa khalayi ni niira na Pentekosite, hiyo nrimwiivalula ni Yesu. Eyo ekeekhaii voolikana, mpatthani. Hiyo ninkhala vathi va oreeriwa wahu. Ayo, mulopwana.

⁷⁵ Awo amuhin'ye oniirani wa Pentekosite, ni ti nipuro nimosa paahi weiwo aMetotista, aPatista, Maprespiteriyaano, n'aPentekosite anrow'aya omuphwanya Owo, ti otthikela weiwe nyuwo omuhin'y'anyu-wo. Ori vayi ohakalala wa Apwiya? Ori vayi owerya w'Apwiya? Ekereja enookoha olelo, “Exeeni—exeeni emukhumelenle Muluku a ehantisi?” Owo onaawehererya athhu Awe omwiihana vanlakani. Masi e . . .

⁷⁶ Khanikhanle wira muhina mwa miromolelo. Khanikhanle wira vathi va psikoloxiya. Khanikhanle wira ni aritimeetika, wala khanikhanle wira n'usoma. Hiyo ninoovalaana, wiikawanya. Hiyo khanihiyo ookawanyeya. Hiyo vekeekhai na mutthu mmosa mwa Kristu Yesu. Hiyo othene nri mmosa mwa Kristu, nto miromolelo sahu khasinkhalakhala siiraka. Sinamwi sikhaneene sooreera, iyo khasinrowa wira. Osoma wahu ti mukhottiheryo muulupalexu Ehapari yooreera otonko aya okhalana, osoma.

⁷⁷ Entthun'ahu kahi osoma. Hiyo nintthuna owerya ni wooniherya wa Eroho Yowarya otthikela mukereja wira yooniherye owerya. Yesu khonahimyeke wira, “Murowe mulaponi mothene mwa—mwasomihe.” Owo khonahimyeke

wira, “Murowe mulaponi mothene mwapake...” Owo ohimye wira, “Murowe mulaponi mothene mwalaleye Ehapari yooreera.” Nto Ehapari yooreera wooniherya owerya wa Eroho Yowarya, ohihimuwa. Hiyo nlelo nri ikilomo emilyawu ni imiya thanu na mosa ni thanu na xexe ottaiwene wa vatthu vaathuneya wira nikhale. Nrowe neette nrowaka ohoolo. Nrowe nitthikele vatthu omuhiyaly’ahu Yoowo oniirani wa Pentekosite.

⁷⁸ Yesu oohimya, mwa Yohani, kookupali, kapiitulu 15, Owo ohimye wira, “Miyo ka Mwiri; nyuwo mwa irintta.” Ahe vano, vakhala wira Mwiri uwo waahiphuwa erintta yoopacerya, nto mwa erintta yeeyo khulepa Eliivuru ya Miteko, erintta yanenli enrowa opaka Eliivuru ekina ya Miteko. Erintta ya neeraru enrowa opaka Eliivuru ekina ya Miteko. Ni khula erintta enikhuma vaMwirini vale enrowa olikana ni erintta yoopacerya.

⁷⁹ Vano, vanniweryaneya ottopanyerya, hiyo noosuwela eyo. Miyo kihoona mwiri mmosa sitriinu waarina mithinto soophiyaka mithanu na tthaaru sa mihokorokho soovirikana. Miyo kihoona murarance waima atoranza, ni alimawu, n’itthu sothene sikina memmo, masi saaroottopanyeriwa-mo.

⁸⁰ Ti yeeyo eri mulattu olelo. Hiyo ninoottopanyerya-mo ankhili ahu, ottopanyerya-mo miromolelo sahu, masi mwiri ule wakhalkhalaru ophuwaka mwiri mukina, mmansaya, onrowa okhala ntoko soopacerya saari mwa yoowo. Aleluya! Oh, ikereja sinootankaxana, masi onnitthuna owerya woopacerya. Ennitthuna Eroho Yowarya, owerya wo ohihimuwa wa Yesu Kristu. Ti yeeyo Owo onihimenry’awe wira niire.

⁸¹ “Miyo ka Mwiri, nyuwo mwa irintta.” Mwiri w’eviteera waphuwaru, vano owo khunakhuma ni iwuuva sooreera sooripelela, eviteera ekina enrowa wiima enookhalana iwuuva sooreera sooripelela. Vakhala wira Mwiri woopacerya waahirwa, vano awo khumora vathi va ekusakelo ya Eroho Yowarya, vano awo khupaka miiriirya suulupale, ni ithoonyeryo, khweemererya onamoon aya vamaithoni v’olumwenku.. Anceene aya hata n’unamoon aya mmansaya, awo, n’iphome aya, awo yaaheemererya onamoon aya. Awo yaahivira mwa inamuna sothene sa itthu soowoopiha ni itthu sothene wira eruuhe Ehapari yooreera. Awo yaahihaawasa; awo yaahimaniwa; awo yaahihukhummwa. “Nihaana oroihiwa Wirimu, mphareyani wa ithutu, akina ewanneene wira ephwanye otthuveliwa, ni evinreene mphareya mwa ephome?” Exeeni enweherery’ahu wira? “Kihaana owana vakhala wira kihaana oruma. Muncererye ominyala waka, Pwiya.” Vekeekhai. Hiyo ninthuna e. . .

⁸² Hiyo khaninthuna muromolelo musya. Hiyo khaninthuna empa ekina ya ekereja. Etthu entthun’ahu olelo muhakalaliho wa khalayi, w’ePentekosite w’osulu wooripelela, oniiva etampi,

waaphattunwe oPentekositeni ni onthhikela-tho mukereja, owerya tho wa Eroho Yowarya, wira emuruuhe Yesu vanlakani.

⁸³ Muluku a ehantisi okathi wothene onnoorwa vanlakani okathi wooxankiha. Hiyo nintthuna yoowo. Owo ti mulattu ni ekerej'ahu olelo. Hiyo ninoohala ottuli saana. Hiyo nimmorela mihapo sa molumwenkuni. Nto vakhani-vakhani, eyaakha t'yaakha, onipacerya okhwa vakhani n'unyaala.

⁸⁴ Onoophiya okathi w'ovakulela naanaano va. Muluku onoorowa ovakulela vekeekhaixa ntoko seemenly'aka vapulpitu va. Muluku onoorowa ovakulela wira yiime mihokorokho. Owo onoorowa othikilasa meettelo a molumwenkuni nihiku nlo. Etthu yoowuliha muru, moota ekereja eniiseettih'aya mwa nsina n'etiini.

⁸⁵ Nto hiyo ninnoona wira, Yesu varonw'awe, okhwa orookela. Okathi Yesu onihiy'awe ekerej'ahu, owerya wa Eroho Yowarya onoohiya ekerej'ahu, eyo enoopacerya ovukuwa khu—khukhwa. Nto nuuvira okathi vakhani khenkhalana etthu. Vano, okathi Yesu okhumaly'awe, okhwa waahikela. Oh, waari okathi xeeni ule w'oxanka.

⁸⁶ Nto nwehe, awo yaaneetta yiikohaka, vano khuruma wira aihaniwe Yesu, masi Owo khuhirwa. Awo khuruma wira aihaniwe-tho, nto Owo khuhirwa, masi Owo aahisuwela etthu aarow'awe wira. Owo onnisuwela ohiy'ula, etthu onrow'awe wira. Khiivo epweteiye n'Uwo: Owo onnisuwela oratteene etthu entthun'awe wira. Owo onrowa ovenxa nloko n'atthu, vekeekhaixa ntoko seemenly'aka vapulpitu va. Owo onooovenxa nloko n'atthu mwaha wa Nsina Nawe eriyari ya nloko n'Amalapo. Owo onimwiira.

⁸⁷ Owo okathi w'aYuta onaattamela vano, nto w'Amalapo onoomala, okhala wira awo arookhuma paahi. Awo anoomukhootta Kristu; awo anookhootta ithoonyeryo saya; awo anookhootta sothene sinihaniwa s'emuluku, ni aniihana ntoko enamuna emosa ya telepatiya ya mmuruni wala owerya wa xetwani ni wira...Awo anooveeha Eroho Yowarya ni yitthittaka erowaka ottaiwene wa Muluku. Vano Muluku onrowa okuxa nikhuru nenlo nooyeva, nuuvira okathi vakhani, ovenyihe Ekereja emosa yookhalana owerya, vano nto ottikiherye Eroho w'aYuta, ni okuxe Ekereja Mmalapo aroihaka owaani. Vekeekhai ekhweeli. Eyo enoopakiwa vano. Ahe, hiyo nihanle ophiya wookiseryani, w'okathi.

⁸⁸ Yesu, Owo aahisuwela. Nto okathi vakhani Owo khwira, "Mpatthan'ihu Lasaro onoorupa."

⁸⁹ Vano, awiixutti yuupuwela wira owo aammumula vakhani. Owo khwira, "Ahe, akhala wira onoorupa, owo ori saana."

⁹⁰ Ahe, Owo aahimye mwa Yawawe...moolumo aya, wira yiwe oratteene, khwira, "Owo ohookhwa, ni mwaha wa nyuwo Miyoo kootteeliwa murima mwaha w'ohikhala-wo." Munnona?

“Mwaha wa nyuwo, kootteeliwa murima mwaha w’ohikhala-wo.” Okhala wira awo yaamwiira anvekenleene Owo wira—wira avonihe—wira anvonihe, masi Owo aanisuwela wira khaakhanle wira, okhala wira yoowoona yiira nlelo. . . nuuvira mahiku ale maxexe Owo aahisuwela wira ole waari okathi Atithi yaamuhimenry’aya Owo. Moota enreer’aya; Owo aahihimya vamahiye, “Tithi, Miyo kinnooxukhuruni, Nyuwo muhiwa, masi kinihimya paahi mwaha w’atthu ala arukurenrye va.” Munnona? Owo aahisuwela etthu aarow’awe wira. Owo khwira, “Miyo kinoorowa kanvenxe.”

⁹¹ Vano, kinniwerya otthokelela wira etthoko ele yaamukhaani yaari vooriipiwa murima saana. Mulipa aaphavela yolya aahirowa, oriipiwa murima. Oh, ti yooreerexa mwakhala ni etthoko yo wiiniwa murima wala murima woowiiniwa, vano nto Yesu onarwa naanaanoru, kahi siiso? Kinniwerya otthokelela omoona Marta, mwaamuthiyana ooreera n’ikuwo yooriipa wiitho wawe, ni Maria mwaamukhaani, n’awo apatikhanne-ene mmosa ni mukhw’awe, yiiraka, “Ninrowa wira xeeni hiyo? Apaapa n’Amaama aarowa, ni munn’ihu oophenteya. . . Vano, hiyo nookhuma okereja, ni nihoomoliwa eriyari aya, ni nookhuma wira nimutthareke Yesu a oNasareti. Vano Owo oosusa oonihiya, nipuro nlo.”

⁹² Kinniwerya omwiiwa nawaape mmosa orwa wira, “Eyi, ori vayi Mpenuxa eMuluku ule, Profeta ole a oKalileya? Ori vayi Yoowo vano? Moone, vamphiy’aya vekeekhai okathi wa Owo wira etthu, Owo onoorowa.” Eyo vo. Moone, Muluku omusivela wira yeeyo pahi, wira aahiye atthu pahi, paahi, aahiye atthu wooniherya ele ekhanly’aya, ayo, owehererya paahi wira owoone etthu akhanly’aya vekeekhai. Owo onnaavaha eparakha. Owo onookhumelela, khwiisoniherya Mmansawe, wiisuweliha Mmansawe w’atthu, wira oone paahi enamuna xeeni y’eyaakhulelo awo anrow’aya okhalana, wira oone paahi etthu anrow’aya wira mwaha wa yeeyo.

⁹³ Vano, hiyo ninniphwanya nto, nuuvira ma—mahiku vakhani, mahiku maxexe, Lasaro oohaawa aahikwa. Awo khunvitha. Nihiku nanenli, nihiku naneeraru, nihiku na neexexe. . . Vano, khula mmosa oosuwela wira wuntta ompacerya nuuvira mahiku mararu: ephula enoomora wiitho, toko. Vano nto wuntta onoopacerya; axiitthu a musapalani anoopacerya okhuura erutthu. Awo yaamuhenle vathi, khuhela nluku nuulupale vasulu va muttupha awo yaamuhenly’aya-mo. Nto imaara kamosa-kamosa, aximwali awo yaanikhuma n’urowa okokhora vamahiye ni wunla.

⁹⁴ Nto nuuvira okathi vakhani, ehapari khumwaramwareya, “Yesu ohoorwa. Hiyo noomoono Owo akelaka mmuttettheni.” Oh, Marta ole mwaamukhaani, ahaareere okhala, ntoko, oopisa wira etthu, owo aahooniherya nto etthu aapakaniw’awe. Owo onoorwa va. Owo onoorwa mphironi nto, atthimakaka

aphavelaka. Kinniwerya owiwa kamosa-kamosa w'awo mphironi yiiraka, "Ahe, kinoona wira mookupali vano, wira etiini anyu yaari yooootha." Owo khwaaliyala paahi khupwaha, khuvira ohoolo w'anamuulumela othene. Owo khurowa mpakha omoona Owo, khino okilanthene-ene vakompa v'ephiro.

⁹⁵ Vano, enikhala ntoko, owo aahaana...owo khino aahikhalana ehaakhi yoomuulumela ni—ni omulavulela soonanara Yoowo. Vano, owo khaatthimakale khwira, "Nkawehani va, nkawehani va, Nyuwo. Nyuwo mwaahaana okhala Profeta, Mutthu a Muluku. Mwahaarwenleni okathi owiihann'ahuni? Vano, hiyo nnootheiwa mpooma vano. Hiyo nirookhuma okereja wahu wira nootthareni Nyuwo." Yaakhala ntoko owo aahikhalana ehaakhi. Masi moosuwela, vekeekhai ntoko silaleiy'aka, *Mwaapwittipwitthi Ni Epompa*, hiyo nakhala mwaapwittipwitthi, mwaapwittipwitthi onnihiya khula ehaakhi orin'awe. Eyo ekeekhai voolikana. Owo khorina hat'etthu woohikhala manri, nnakhala vo owo ohaana ohiya. Nto nyuwo munoohiya khula ehaakhi murin'anyu wira mmurumeele Muluku. Eyo ekeekhai voolikana.

⁹⁶ Miyo kaanaapwapwela athiyana mwaha wa enamuna awo yaawar'aya ikuwo iya sikhaani, moosuwela, nto awo khwira, "Ahe, hiyo na—hiyo n'atthu a wAmerika. Hiyo nnoowerya wira etthu entthun'ahu."

⁹⁷ Miyo khwira, "Vekeekhai eyo ekhweeli, masi nyuwo mwaari mwaapwittipwitthi, munoohiya ihaakhi sanyu." Waavura asikaro ni wira itthu soonanara siiso, eyo etthu yootepa onanara muthiyana okhanly'awe wiiraka. Vekeekhai eyo ekhweeli.

⁹⁸ Muthiyana mmosa aahikiirela, kahi khalayi, aalavula ni miyo, khwira, "Masi, Munna Branham, khasimpakiwa mithinto mikina sa ikuwo."

⁹⁹ Miyo khwira, "Masi nlelo annipakiwa maakina oottottha ni sinnitumihiwa ikuwo sootthanvwa. Khanivo ntthyawelo." Eyo vekeekhai ekhweeli.

¹⁰⁰ Muupuwele, nihiku nlo, khino muri ooloka nno n'aiy'anyu, masi munoorowa waakhula mwaha w'oraruwa mwaha wa yeeyo, vekeekhai: "Ole oninweha muthiyana anwereihaka murima, ooraruwana muthiyana'owo mmurimani mw'awe."

¹⁰¹ Mulattu xeeni n'athiyana aPentekosite olelo, ti yeeyo eniikoh'aka. Moota munihiy'anyu muttharelo wa khalayi. Moota aximai inyu yaawarak'aya maihi oorakama, nto olelo athiyana aPentekosite animwiipintari ntoko nikhuru n'Alipa a Karnavaale, n'umettha maihi aya, n'uwara ikuwo sikhaani sookhuveyasa siiso, vekeekhai ntoko enamuna yothene... okhuma n'uthikila malaxi oxekuwa, alopwana eviraka, munnisuwela, muthiyana, wira muhaana orowa waakhula mwaha w'oraruwa n'axilopwan'awo? Nyuwo muniisooniherya

w'awo ni niwoko nenlo. Eyo erooho yootakhala mukereja ni mw'atthuni, nave awo khansuwela. Oohoona nave khansuwela. Eyo ekeekhaii.

102 Khino nyuwo munimwiira nkirina ehaakhi y'ohimya yeeyo ntoko namalaleya ehapari. Ahe, miyo—miyo kihaana otthara ohoolela wa Eroho Yowarya; ti yeeyo tu ekhanly'aka ohimya. Nyuwo...Miyo koophwanyani w'olamuliwani, nto nkinrowa okhalana ephome anyu mmatatani mwaka. Mukhume mwa khula etthu yaamukhaani enlikana ni Satana. Mukhale ottaiwene wa yeeyo. Mwiivalaanye n'iyoy. Nkincala aratti akavi a mutelevisawuni...Nyuwo khuamukhanle, mu, ntoko muratti a mutelevisawuni; nyuwo mwa mwaana muthiyana a Muluku.

103 Miyo kaahilaleya mukereja wa pastore mmosa nihiku nlo voosiisu, wa mutthu mmosa epottha a khalayi, okathi saatumihiw'aya ipottha khalayi. Nto awo yaanirwa ni othuma wo weesihiwa. Nto atthu yaari, yaamuhihimerya, yaamunla, mwaha w'elapo aya; awo khiyaakhalakhala-tho atthikaka. Nto awo yaahaana omaniwa. Vano awo yaanaathuma vekeekhai ntoko yaathumiw'aya ekaaro, n'itthu p'itthu paahi, isisapo, vano yaanaatumiha atthu awo.

104 Nto nihiku nimosa, namathuma mmosa khurwa, namatumiha-tho, mpakha vatthu vaalupa...ematta emosa yuulupale, kiireke. Nto owo khwira, "Ipottha kavi murin'anyu muntumih'anyu?"

105 Khwira, "Ahe, kookhalana kamosa-kamosa wira kaakakhanye." Awo yaatthuna waaphwanya ale aalupale. Yaakuxiwa aximai ale, axitiithi...Vakhala wira muthiyana omuthenly'awe aari mwaamukhaani ni ootteettheya, yaakuxiwa axilopwan'ala aalupale ookhalana ekumi ni waaphitaaniha wira eyarelane...ntoko ikhavalalo ni inama. Eyo khenakhaleke etthu yooreera. Muluku ompanke mutthu. Mutthu khupaka ipottha. Kehiyo yooreera opacerya wene, nnakhala. Muluku khontthuna wira hata mutthu akhale epottha. Nnari, mulopwana. Ni hata...Nwehe etthu yaakhumelenle.

106 Nto eriyari ya sothene iye, mulopwan'ola khwira, "Ahe, kaanitthuna waathuma kamosa-kamosa..." Owo khunweha mmiravo mmosa vale. Awo khiyaarina ommana. Ereru awe yaari yoottukhuwa, ntoko mutthu ekeekhai, eettakasaka vale. Nto namatumiha-tho ole khwira, "Kaatthuna kimuthume ole."

107 Owo khwira, "Masi ole khontumihiwa."

108 Owo khwira, "Ahe, mwaha wa xeeni?" Khwira, "Ole ti mukhulupale?"

109 Owo khwira, "Nnari, ole epotthaa."

110 "Ahe," khwira, "mwaha wa xeeni? Munoomulyiha oratteene waavikana ale akina?"

111 Owo khwira, “Nnari. Owo onlya iwe onaapeiwa ntoko ale akina. Owo epotthaa.”

112 Khwira, “Exeeni enimukhaliha oovirikana saana n’ale akina?”

113 Nto mwaneene khwira, “Miyo kaahiphavela osuwela yeeyo okhuma khalayi, masi nihiku nimosa khusuwela. Owanny’awe wu, atithi awe amwene a nihimo. Nto onamwi okhanleene muletto okhumme owanny’awe, owo nlelo oosuwela wira mwaana a mwene nto oniiseettiha siiso.” Vakhala wira eyo. . . Vakhala wira mutthu a wAfrika aaniwerya osuwela wira atithi awe yaari mwene, ni nno muletto muttethe w’amalapo nlelo aaniwerya osuwela wira epantte ekina y’ephareya owo mwaana a mwene, moota xeeni waatthuney’aya athiyana n’alopwana wiiseettiha yakhala aana alopwana n’athiyana a Muluku? Mwiireke siiso. Vekeekhai. Mwiiseettiheke; mwiikukutthe ni mwiireke ntoko aana alopwana n’athiyana a Muluku. Khivanxankiha, mukhalelo xeeni.

114 Hiyo nri va. Oh, Marta mwaamukhaani, aahirwa atthimakaka. Yaakhala ntoko aahikhalana e—exariya yoohimya etthu yoomuulumela Owo. “Nyuwo mwahaarwenleni wa munn’aka? Nkawehani itthu siwiireny’ahuni, nave Nyuwo khuninyanyala.” Ahe, owo aahimye-ru siiso, ehantisi iyo khiyaarowa omalela ntoko emalenly’aya. Nnari, mulopwana. Ti enamuna enaattamel’anyu yoovaha y’eMuluku ya Muluku. Muluku aveleeliha yoovaha, nyuwo muhaana waattamela oratteene. Vakhala wira munniroromela ophwanya etthu wa yeeyo, muhaana waattamela oratteene. Ni Marta aanisuwela eyo. Owo khino aahisoma sa muthiyana a oSunami ni mwan’awe. Nto owo. . . Vakhala wira muthiyan’ole a oSunami aahisuwela wira Muluku aari mwa Eliya, khaatempе Owo okhala mwa Yesu? Vekeekhai.

115 Tivo, owo aarwiye ni waattamela wooloka. Owo aarootthimaka khukokhora munawoni mw’Awe. Miyo okisivela eyo! Khukokhora munawoni mw’Awe khwira, “Pwiya. . .” Eyo ti etiitulu Awe yoolikana. Ti yeeyo Owo aary’awe. Owo aari Pwiya’awe. “Pwiya, Nyuwo mwaari vaava, murokor’aka khaakhwa.”

116 Oh, wulu! Oh, kinniwerya otthokelela woona murim’Awe muulupale okathi Owo aamuweh’awe muthiyan’ole ooreera, maithori emoraka wiitho wawe. Khwira, “Pwiya, Nyuwo mwaari vaava, murokor’aka khaakhwa.” Nwehe etthu owo aahimaly’awe. “Masi hata naanaano va, Pwiya, hata owo akhwaaka, hata axiitthu a musapalani yeettaka mw’erutthuni mwawe, hata naanaano va, Pwiya, sothene Nyuwo sinthun’anyu onvekela Muluku, Muluku onimoovahani.”

117 Oh, eyo ti esiri ene. Nyuwo pooti wira, “Miyo koovira khula exipiritaali. Meetiku oniira wira kinrowa okhwa, masi hata

naanaano va, Pwiya. . . Miyo kiri othene owooceya mwaha wo wiipa makhonyokhonyo; nkinwerya weetta, masi hata naanaano va, Pwiya. . .”

118 Mwanamwan’ole aarina ehikhiri yuulupale *saale* nsana ohiyu. Khiivo mukhanly’anyu wira. Eyo yaamurora wuncerereya ephutule muru awe okhwe, “Masi hata naanaano va, Pwiya. . .” Owo nlelo Muluku mmosaru. Owo nlelo ti Pwiya mmosaru. “Hata naanaano va, Pwiya. . .” Ni Owo okilante moonoo woolopwana wa Muluku Oowerya sothene, alapelaka attharihaka itthu hiyo sinihimy’ahu wira Owo ooniirela.

119 Vano, vekeekhai kinniisoona okhala natiini. Vekeekhai. Nyuwo munrowa okiihana santu oophirikeya khula enamuna, vano vanreerela mpacerye, mmalihe naanaanoru.

120 Tivo, ayo, mulopwana, “Hata naanaano va, Pwiya, sothene Nyuwo sintthun’anyu onvekela Muluku, Muluku onimwiira.”

121 “Mwaavekela Atithi etthu p’itthu mwa Nsina Naka, Miyo kinimwiira,” Yesu t’ohimnye.

122 “Hata naanaano va, Pwiya, sothene Nyuwo sintthun’anyu ovekela, Muluku onimoovahani.” Oh, siiso eyo yaamorinhe ikharari murima Awe muulupale.

123 Owo khwira, “Murokor’inyu onookhala-tho mukumi.”

124 Owo khwira, “Ayo, Pwiya. Owo onookhala mukumi. Owo aari mmiravo ooreera murima. Owo onimorwa moohihimuwani w’atthu othene nihiku nookiserya.” aYuta ale yaanaamini ohihimuwa w’atthu othene. “Owo onimoorwa woohihimuwani wa mahiku ookiserya.”

125 Nkanweheni. Owo aahiikhaliherya. Owo khwira, “Miyo ki Ohihimuwa ni Ekumi.” Oh, wulu. Khaatonko okhala mutthu aawerya ohimya yeeyo khalayi. Khonrowa-tho okhala mmosa ohoolo, onwerya ohimya. Owo ti Mmosa paahi onwerya ohimya. “Miyo ki Ohihimuwa ni Ekumi,” anihimya t’Apwiya. “Ole onikaamini Miyo, hata anakhwaru, onookhala mukumi. Ni ole orina ekumi ni onikaamini Miyo khankhwa-tho. Nyuwo munnaamini etthu ila?”

126 Owo khwira, “Ayo, Pwiya.” Oh, aahisuwela wira yaahala okhumelela etthu. Ehaana okhala.

127 Okathi waamini onikhuma vamurima w’exariya onikuman’aya ni Muluku, ikaruma iye sineettiha sinookhala vamosa *siiso*. Etthu ehaana wiiranya. Miyo kinnitharamula muthukuman’ola ohiy’ula, mwa Nsina na Yesu Kristu, muhiye waamini wanyu oluttane ni Muluku siiso, muhina mwa minuutu vakhani ninookhalana Pentekosite mukina. Onookhala muhakalaliho wa enamuna emosa mmuttettheni mu, vahaarow’aya okhala mapiliisa oophiyerya mulaponi wira yaamaalihe. Eyo ekeekhaii. Onookhala muhakalaliho w’ekeekhai. “Hata naanaano va, Pwiya. . .”

128 “Ahe, Pwiya, hiyo noohiya *ela*; hiyo nihiira *ela*, ni nihiira *ele*.” Nkincala etthu mwiiraly’anyu, “Hata naanaano va, Pwiya . . .” Owo onlipelela nyuwo omwiihana. Owo . . . “Nyuwo munnaamini etthu ila?” Vekeekhai. Ayo, mulopwana. “Hata naanaano va, sothene Nyuwo sininvekel’anyu . . .”

129 “Mumpwehale vayi?” Vano, Owo onrowa mpakha vamahiye. Owo aari mutthu voophiyerya wira anle; Owo aari Muluku voophiyerya wira aahihimuxe alipa-ookhwa.

130 Va okathi ovinre, muthiyana mmosa oniira mpannta wa nikhuru nimoso n’atthu. . . Miyo nkinakhaliheke eyo muhapo olavula sa miromolelo. Masi muthiyan’ola. . . Awo khanaamini wira Yesu aari a oMuluku. Awo yaahimya wira Owo aari profeta paahi. Vano, Owo aari. . . Vakhalala wira Owo aari profeta paahi, hiyo othene nri mutampini. Owo aari Muluku, hat’etthu woohikhala Muluku, ahiiso namawoka muulupalexa olumwenku otonko awe okhalana. Eyo ekeekhaii. Owo aari oomuvikana mutthu. Owo khwira, “Owo khaari a oMuluku.”

131 Khasireere seiyo mwa ehapari yooreera *ela* y’epatthani olelo; weererya omukhaliha Yesu Kristu profeta. Vano, Owo aari Muluku a maprometa. Vekeekhai Owo aari yoowo.

132 Owo khwira, “Miyo kinoowooniheryani ni Bibilia anyu wira, ‘Owo aari mutthu paahi.’”

133 Miyo khwira, “Mooniherye.”

134 Nto owo khwira, “Okathi Owo oronw’awe vamahiye va Lasaro, Bibilia ohimye wira, ‘Owo aahinla.’ Owo aahaana okhala mutthu onookhwa ahiiso Owo khaarowa owerya wunla.”

135 Miyo khwira, “Muhano, eyo ti Yoolempwa anyu?” Miyo nkinthuna okhala namaveeha ohimyaka *ela*, masi kinimooleelani etthu kamuhimenry’aka.

136 Owo khwira, “Ti yeeyo.”

137 Miyo khwira, “Yoohimya eyo ti yootteettheya ovikana esooapa epakiwe ni muuttutthi wa mwalyakhu okhwiye mwaha w’ovoliwa.” Miyo khwira, “Ahe, nyuwo—nyuwo khamurina etthu emosa wira mulipane.”

138 Owo khwira, “Vano, Owo aahinla. Eyo yaahooniherya wira Owo aari mutthu onookhwa.”

139 Miyo khwira, “Owo aari soopiili ookhwa ni oohikhwa. Owo aari Muluku mw’erutthuni.”

140 Owo khwira, “Oh, ethiru!”

141 Miyo khwira, “Owo aahirowa vamahiye anlaka. Eyo ekeekhaii, masi okathi Owo iilokihenry’awe erutthu Awe yaamukhaani. . .” Bibilia ohimye wira, “Khiyaakhanle yinceene wira ninweheke Yoowo; khaareenre wira anisiveleke.” Masi okathi otanthe awe makhata ale makhaani khwira, “Lasaro, mukhumele ota nno.” nto mutthu aakhwiye khuvira

mahiku maxexe khuntta mmahiye, owo aahikhumela ota. Ole aahinvikana mutthu. Mukoonihe mutthu onwerya wira siiso. Yaari exeeni? Wuntta waahimusuwela Mwaneene aya. Ekumi yaahimusuwela Mpattuxa aya. Etthu yaahaana okhumelela. Owo aahilavula nto mulopwana aakhwiye ni ari mmahiye mahiku maxexe, khuhihimuwa, khuyenya khweemela, khukhala mukumi. Aleluya! Ole aari Muluku mwa Mwan'Awē. Ayo, mulopwana. Ole aari Muluku aisuwelihaka Mmansawe mwa Yoowo, Mwaana. Ole aari Muluku alavulaka, kahi mutthu.

¹⁴² Ole aari mutthu okathi aawehaly'awe vamwirini vale nihiku nle aphavelaka etthu wira olye. Ole aari mutthu. Masi okathi Owo aakunx'awe iphawu thanu n'ihopa piili khwaalyiha athu ikonto thanu, ole aahinvikana mutthu. Ole aari Muluku aalyiha awo iwe. Owo aahinvikana profeta, oomuvikana mutthu, Owo aari Muluku-Mutthu. Vekeekhai.

¹⁴³ Owo aahimmathi ottuli wa ekalaw'ele yaamukhaani ohiyu ule, nto iphareya sirumaka ni sitekhumaka ntoko erooya y'esuupha vale mphareya mme mwa ikuru, okathi axetwani ikonto muloko a mphareya yaalamphe aya wira yaamurowa omuxuwa Owo ohiy'ule. Owo aari mutthu, ootteetheya ni ookhulumuwa mwaha wo waavekelela aretta, ommaathale-ene ottuli iwe; ni etheku hata khiyaamuhaaxa. Owo aari mutthu okathi waarup'awe, masi vavenny'awe, khuhela nnawu Nawe vamukhoyini v'ekalawa, khuweha osulu, khwira, "Mmaale, mwiikhalele," nto itheku ni mawimpi khumwiwelela, ole aahinvikana mutthu. Ole aari Muluku mwa mutthu, aisuwelihaka Mmansawe. Eyo ekeekhai.

¹⁴⁴ Owo aari mutthu vamwiikimanyo okathi aanlenly'awe omoreliwa ikharari. Okathi Owo okhuwenly'awe iiraka, "Nookivola ntthona," ole aari mutthu. Okathi Owo okhwi'y'awe, aari mutthu, masi voosiisu wa Paasikha okathi otaphunly'awe ikanyeryo sa mookhwaani, omooroni, ni mahiye, khuhihimuwa, Owo aahinvikana mutthu: Aari Muluku owooniheriwa. Khivanxankiha mulipa-oolepa ohimaly'awe:

Akhalaka, Owo ookiphenta; akhwaaka, Owo
 ookoopola;
 Vavithiw'awe, Owo oorooha itampi saka
 ottaiwene;
 Ahihimuwaka, owo ookikhaliha naxariya
 mahala voohimala-tho:
 Nihiku nlo Owo onimoorwa—Oh, nihiku
 noovuwa!

¹⁴⁵ Owo iirale, "Okhala wira Miyo ka mukumi, nyuwo munookhala akumi nave. Nyuwo munnaamini etthu ila?" Owo mmosaru nsana, olelo, ni mahiku othene. Nyuwo munnaamini etthu ila? Kinnaamini wira Eroho Yowarya eri vaava vano. Nyuwo munnaamini etthu ila? Kinnaamini wira

Eyo enoonisariha ni Mukhalelo Aya. Nyuwo munnaamini etthu ila? Kinnaamini wira Eroho Yowarya entthuna omwarexa Mukhalelo Aya, yaavonihe aretta othene, owiiriha atthu othene ahaakhenle Eroho Yowarya osarihiwa. Nyuwo munnaamini etthu ila? Munnaamini ni murim'anyu wothene? Nrowe nivenye neemele ninvuwihe Yoowo. Miyo kinnaamini wira Eyo enoonimorela naanaano va.

¹⁴⁶ O Pwiya Muluku, Mpattuxa wirimu n'ilapo ya vathi, Mwaneene Ekumi Ehinimala, Namavaha a soovaha sothene sooreera, hiyo "Hiyo ninnaamini etthu ila," Pwiya. Hiyo ninnaamini wira ti Nyuwo va vamuthukumanoni. Hiyo ninnaamini wira ti Nyuwo munivaha eparakha minepa sahu. Hiyo ninnaamini wira ti Nyuwo mummwaraxela Eroho Anyu mwa hiyo. Hiyo ninnaamini wira Nyuwo mwa mmosaru nsana, olelo, ni mahiku othene. Hiyo ninnaamini wira Nyuwo munikhala vohimala-tho ni masin'ahu aalempwa muLiivuruni mw'Ekumi ya Mwaapwittipwitthi. Erimu yothene n'ilapo ya vathi sinoomala, masi hiyo ninookhala vohimala-tho, okhala wira Nyuwo munkhala vohimala-tho. Pwiya, Nyuwo moonilaiherya yeeyo. Hiyo ninnaamini ni murim'ahu wothene. Ni sothene siri mwa hiyo, hiyo ninnaamini, Pwiya. Miyo kinnimphenta Owo, Miyo kinnimphenta Owo.

¹⁴⁷ Nyuwo munnimwaamini Yoowo? Kinnaamini wira eyo Erohoo Yowarya. Yookhala Etthu ennimorela. Nyuwo munnaamini etthu ila? Miyo kinnaamini wira Eyo entthuna onvonihla khula mutthu naanaano va. Nyuwo munnaamini etthu ila? Munvenxerye matat'anyu Yoowo. Nvenye mweemele. Nyuwo munnaamini etthu ila? Eroho Yowarya eri vaava. Ela t'Ile! Petru aahihimya, "Ela t'Ile." Ela ti Yeeyo, Eroho Yowarya.

¹⁴⁸ O Pwiya, Mpattuxa erimu n'ilapo ya vathi, nveleelihe owerya Wanyu, ni iparakha Sanyu, ni oreera Wanyu murima mw'atthu ala, ni mureerihe mirima saya, ni mwaahiye yoone wira Mwaana a mutthu onkhala vohimala-tho. Munivahe, O Pwiya. Hiyo ninnaavahererya wa Nyuwo, mwa Nsina na Yesu Kristu, Mwaana a Muluku.

¹⁴⁹ Khula mutthu ohirina Eroho Yowarya, avenxe ntata amuttotlopele Muluku. Miyo kinnaamini wira Eyo enimoomorelani. Okhale mutthu oniwiixatherya matata. Ola p'ukathi. Xeeni hiyo olipelelaka-tho? Ola p'ukathi. Ola p'ukathi wa Pentekosite, w'otthikela wa Muluku. Mukhale oratteene ni Muluku, Pentekosite! Muttikinye murim'anyu mwa owerya wa Muluku mukumi. Muhiye Eroho Awe erwe ekele mwa nyuwo, eponowele minepa sanyu. Eyo eri vaava ohiyu p'uhiyu, vaava wira yaavonihe aretta, yaavahe woona ale oohoona, mwa owerya wuulupale ni wa ikuru Owo onniisooniherya Mmansawe wira mmosaru mahiku othene. Aleluya!

¹⁵⁰ Munvuwihe Yoowo. Nvenxe matata. Mwiiliyale vary'anyu; musuwele paahi wira muri vakhiviru va Yoowo, ni oreera Wawe murima, ni ovuwa Wawe, ni owerya Wawe, ni omoriwa Wawe ikharari ti woohimala. Owo mmosaru mahiku othene. Nittotopeliwe Nsina n'Apwiya. Aleluya! Oh, nivuwihawe Nsina Nawe Noowaarya.

¹⁵¹ Oh, moota ereeraly'aya, moota Owo ory'awe oowerya. Akavi yaatthuna ovahererya-tho makhalelo wa Muluku naanaano va, emaara ekina? Nvenxe ntata nanyu. Akavi yaatthuna ovahererya makhalelo aya wa Muluku? Ti yeeyo. Nvenxe matat'anyu. Nrowe niwoone aPentekosite. Nrowe niwoone atthu a Muluku. Miyo kinoovenxa ntata naka. "Pwiya, miyo kiri va. Mukirume." Mukuxe Nlaikha vano ni mooro waltaari nto nveleelihe owerya Wanyu wa hiyo, Pwiya. Muluku, munivahe mwa omalela wa Eroho Anyu, O Tithi. Mwiiwe mavekelo ahu, O Pwiya. Mwiiwe mavekelo ahu, ntoko aana anaamini anvenya. Nivuwihawe Nsina Nawe.

¹⁵² Oh, ntoko mawimpi a movuwani emoraka, oh, mattoitto a omoreliwa ikharari. O, avuwihawe Muluku. Minepa sahu silipelele. Nyuwo munnaamini etthu ila? Nyuwo munnaamini etthu ila? Ela Erohoo Yowarya enoorwa. Iya ti ikuru iye sihinooneya sinneettiherya Moomweneni mwa Muluku, iparakhwa sa Pentekosite. Mutthikele owaani. Munnilipeleliwa owaani. Nyuwo mw'atthu ooreerexa. Muluku ontthuna wira mwiivahererye. Athiyana mwiilokihe. Alopwana, mwiilokihe. Nrowe nipacerye othikela wa Muluku ni omurumeela Muluku ni murima wooreera w'ekeekhai.

¹⁵³ Avuwihawe Muluku, Eroho Yowarya eri vamuthukumanoni. Mwiire paahi ele munoon'anyu weettiheriwa wira mwiire. Muhiye paahi Eroho Yowarya yeette mwa nyuwo. Khiivo etthu ekhanly'aka ohimya. Vekeekhai nkinsuwela etthu y'ohimya vano. Eroho Yowarya eri mpaani mothene. Nittotopeliwe Nsina n'Apwiya. Avuwihawe Apwiya. Oh, aleluya! Aleluya! Avuwihawe Apwiya. Mwaattotopole Apwiya. Moota ery'aya yooreerexa, moota ery'aya yoovuwa. . . Moota vanreer'aya, moota onreer'aya ottotopela w'atthu ooreera murima a Muluku wiitho wanyu, Ohoolo wa Eroho Yowarya va yeettaka ni enooniheryaka ovuwa Waya vamuttithini va muulupale ni mwiiwanano mmosa, nivuwihaka Nsina Nawe.

¹⁵⁴ Murukunuwe nvahane mukhono ni mutthu, mwiire, "Mwaattotopole Apwiya, munna mulopwana. Mwaattotopole Apwiya, munna muthiyana." Nrowe nikele mwa yeela nimuhiye Muluku anitanye. Mwaattotopole Apwiya. Ti yeeyo. Othene nyuwo aMetotista, ni aPatista, ni maPrespiteriyaano, aPentekosite, ni Ativentista a Setimu Tiya, khula etthu mury'anyu, nvahane mukhono mmosa ni mukhw'awe Ohoolo w'Apwiya Muluku. Ti yeeyo. Oh, aleluya! Aleluya! Aleluya! Oh, kootteeliwa murima okhala mmosa w'awo. Kootteeliwa murima.

Oh, opwexakasa ixiri, woomola soonanara. Ovuwa! Otaphuwa mwa Apwiya, nivuwihaka Nsina Naya . . . Nittotopeliwe Nsina n'Apwiya. Oh, aleluya! Avuwihawe Muluku.

¹⁵⁵ Oh, miyo okisivela woona eyo: atthu evahanaka mukhono mmosa ni mukhw'awe ni wiitho woothhapa. Owerya wa Muluku wiiraka, "Ti yeeyo. Ti yeeyo, hiyo n'ana a Muluku. Hiyo othene n'ekereja emosa yuulupale, mutthu mmosa muulupale mwa Kristu Yesu, Mwaakameliwa Awe, Ole oovuwa." Orwa w'Apwiya onookhuveela. Atthu Aya anoopatthana ni ophentana . . . ni mphento ni owerya wa Mukhalelo Aya. Oh, ela enkhalantaoko Erimu. Oh, ela ti yooreera. Amen. Oh, moota ery'aya yoovuwexa, moota ery'aya yooreerexa: waakokhorela Apwiya mwa Eroho ni mwa owerya. Okathi xeeni. (Eyo yaari wira neemele; ninoopacerya.)

¹⁵⁶ Khiivo paahi e . . . miyo kahaaleela axinna, "Axinna, khanivo nipuro no weemela." Khanivo nipuro va wira . . . Hiyo hata khinnapacerye, tivo khanineemela. Paahi—yooreerexa paahi . . . Akavi anoona oreera saana? Mukhalelo w'Apwiya paahi, oh, wulu, ti yooreerexa, Mukhalelo w'Apwiya va.

¹⁵⁷ Vano, Mukhalelo w'Apwiya ori vaava wira waavonihe aretta, waakhalihe atthu akumi. Nwaamini Yaawo paahi. Nyuwo munniwaamini? Naawaaminikiru Yaawo, sothene sinniweryaneyya. Nyuwo munnaamini yeeyo? Nyuwo munnaamini wira owo Mukhalelo w'Apwiya?


¹⁵⁸ Vano, nyuwo mu . . . Mukivahe okathi vakhani paahi, okathi vakhani paahi vano, ni nwiriyane okathi vakhani paahi. Mukihiye kiwooniheryeni wira eyo Eroho Yowarya va. Mukihiye kiwooniheryeni wira Eroho Yowarya, Yeele enlavula, Yeele eniira etthu ene, ennisuwela eyo. Akavi ari va vano, arwiiye mu aretta? Nrowe noone matat'anyu. Ale yaarina eretta . . . Aakhala atthu . . .

¹⁵⁹ Ookhala mulopwana eemenle vale. Nyuwo munnaamini, mwenye? Khasikhanle ittikitti sa mavekelo, masi munnaamini wira Muluku onniwerya woovonihani? Munnaamini wira Owo onniwerya okileela muxankiho anyu? Mparirini mw'anyu. Munrowa wooperariwa. Ti yeeyo. Nsina nanyu ti Mwenye Cartwright. Eyo ekeekhaii. Eyo ekeekhaii? Muttikinye ntata nanyu. Vaareera. Rowakani owaani mukhale mukumi, khamunrowa otthuna yoowo. Munnaamini?

¹⁶⁰ Mulopwan'ole omukunxe mwaan'ole mmoononi, munaamini wira ka murumeyi a Muluku? Munnaamini wira ela Eroho Yowarya? Miyo nkinoosuwelani, ekeekhaii? Nkinatoko owoonani kookhalaru; hiyo n'amalapo. Munnaamini wira Eroho Yowarya enniwerya okileela mukattyamiho wa mwaan'owo? Orina ovele. Ti yeeyo. Eyo kahi ekeekhaii? Khweli. Nyuwo khamuhiyo a wenno. Nnari. Nyuwo munwereiwa mmirimani, munoohaawa, yeenyu. Eyo ekeekhai, kehiyo? Nyuwo mwa a oKansas City.

Vaareera. Mutthike, Yesu Kristu onnoovonihani. Aleluya! Munnaamini. Munnaamini ni murima anyu wothene?

¹⁶¹ Va nimphwanyaneya Nlaikha n'Apwiya, vasulu va mukhaani ula—muthiyan'ola mwaamukhaani, mutokweene oophenteya, okilante vaava va, onihaawa mwaha wa xipaatta. Munnaamini wira Muluku onimoovonihani xipaatt'owo, munna? Nyuwo, murina nluwa naamukhaani nooxerya vaxapheyoni vanyu, nvenxe ntata. Vaareera. Rowakani owaani mukhale mukumi. Amen. Oh, ti Muluku; ti Kristu Mwaana a Muluku. Owo oohihimuwa mw'alipa-ookhwa. Owo ori vaava.

¹⁶² Vano, mpweheryane matata mmosa ni mukhw'awe ni nvahererye okathi wooreera wa mavekelo, khula mmosa a nyuwo, kinvekelaka mutthu wira orwe nno. Murwe nno, munna. Murineene matata vasulu mmosa ni mukhw'awe wira yooniherye wira Muluku onnivoniha nave, kookhalana munna va wira ovahererye mavekelo nave. (Mukeleleke ohoolo. Vaareera.) Avuwihwe Apwiya Muluku. 

NYUWO MUNNAAMINI ETTHU ILA? EMK60-0402
(Believest Thou This?)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu, mahiku yeettaka 2 mweeri w'Abiril, 1960, mw'Autitooriyu wa Munusiipiyu oTulsa, Oklahoma, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org